



5. november 2025

UKA 2025/9

Inatsisartut Ombudsmandiata 2024-mut ukiumoortumik nalunaarutaata Inatsisartunit tusaatissatut tiguneqarnissaanik Inatsisartut aalajangiiffigisassaattut siunnersuut.
(Inatsisinut Ataatsimiititaliaq)

Siullermik Inatsisartut Ombudsmandiat Gedion Jeremiassen sulisuilu ukiumoortumik nalunaarusiaannut qujaffingerusuppagut. Nalunaarusiaq imartooq, innuttaasullu pisortanik sullinneqarnerminni pisinnaatitaaffiinut suliaqarnermut pingaaruteqarluinnartoq kingumut pitsaassusilimmik takusassiarineqarmat Siumumiit iluarisimaarparput.

Siumumiit pingaaruteqartittuarparput Nunatsinni innuttaasut pitsaasumik pisortanik sullinneqarnissaat, ombudsmandillu tamanna nakkutingisarivaa, taamaammallu Inatsisartuni inatsisitigut pisussaaffiliinitsigut Ombudsmandi tassaavoq inatsisiliarineqartut malillugit Inatsisartut aalajangersagaannik Naalakkersuisut taamatullu aamma kommuunit ataanni naappertuuttumik sullisisoqarnersoq nakkutigissallugu qulakkiissallugulu.

Nalunaarusiap kingumut takutippaa ingammik ukiuni kingullerni kommunit suliassanik suliaqartarnerat annertuumik unammilligassaqartartoq. Tamanna innuttaasut pitsaanerusumik sullinneqartariaqaraluarnernannik takussutissiivoq, tamassumalu aamma uteqqiattumik, immaqalu aamma pitsanngoriarfiunngitsumik inisseqqinnera ajuusaarnartuusoq Siumumiit oqaatigerusupparput.

Inatsisartut Ombudsmandiata nalunaarusiamini ilaatigut annertuumik tikippai kommuunini suliat meeqqat angerlarsimaffiup avataanut inissinneqartartunut tunngasut amerlasuutigut pitsaanngitsumik suliarineqartartut, tamanna annernarpoq, tassanimi meeqqat angajoqqaallu inuunerat pineqarpoq, piffissarlu sullissinermut pisariaqanngitsumik sivitsorsarneqartarnera pineqartunut qanoq ilungersunartigisarsimanissaa kialluunniit takorloorsinnaavaa. Tamanna akuersarneqarsinnaanngilluinnarpoq, tassuunakkullu iluarsisutissanik suliaqartoqarnissaa avaqqunneqarsinnaanngilaq, pigasuiartumillu sulisoqartariaqarpoq kingusinaartigata.

Suliat pineqartut pisariaqanngikkaluamik sivitsorsarneqartarnerat ilaatigut tunngavilersorneqarpoq sulisut paarlakaappallaartarnerannik aammalu suliani ataasiakkaani allattuisoqartannginneranik, taamaalilluni suliat puigorneqartarlutik unittoortarlutillu. Aap suliat puigorneqartartut unittoortartullu nalunaarusiami Ombudsmandip oqaatsit taakku atorlugit nalunaarusiorpoq, tamanna ajuusaarnarpoq akuersarneqarsinnaananilu.

Taamaammat Naalakkersuisut Kommuunit peqatigalugit suliniarnermi akimmisaarfiusut ajorseriaateqannginnissaat aammalu pitsanngoriarartoqqilernissaat anguniarlugu sulisariaqarput aammalu aningaasartassaat qulakkeertariaqarpaat sullissineq pisortat innuttaasullu akornanni pitsaanerulersinniarlugu.

Nalunaarusiamittaaq kingumut aamma takusinnaavarput Ombudsmandi sineriammi paasititsiniaanerit aammalu misissuinerit arlallit ingerlassimagai, tamanna suleriaaseq Siumumiit toqqissisimanaraarput,



tassuunakkummi innuttaqatitta pitsaasumik avatangiiseqarlutik illersugaaffeqarlutillu pinissaat pingaarteqigatsigu.

Siumumiit taamatut naatsumik oqaaseqarluta Inatsisartut Ombudsmandiata 2024-mut ukiumoortumik nalunaarutaa tusaatissatut tiguarput, Naalakkersuisulli kingumut peqqorusuppagut, tigussaasumik iliuuserisassamik, periusissiamik, allamilluunnit Inatsisartunut saqqummiinissaat pisariaqalersimasoq isumageqqullugu, uparuaatigineqartartummi ukiorpassuarni uteqqiaannarsinnaajunnaarput, iliuuseqartoqartariaqalerpoq.

Qujanaq.

Anders Olsen, Siumut